

Pemangku Raja Pahang dianugerah Ijazah Kehormat UMP



Kuantan, 18 November- Pemangku Raja Pahang Kebawah Duli Yang Maha Mulia Tengku Mahkota Tengku Abdullah AlHajj Ibnu Sultan Haji Ahmad Shah hari ini dianugerahkan Ijazah Kehormat Doktor Pengurusan dalam Majlis Konvokesyen Universiti Malaysia Pahang (UM) Kali Ke-12 hari ini.

Anugerah disampaikan Naib Canselor UMP, Profesor Dato Dr Daing Nasir Ibrahim Majlis Konvokesyen UMP Ke-12 yang berlangsung di Kompleks Sukan UMP hari ini. Hadir sama dalam majlis Menteri Besar Pahang, Dato' Sri Diraja Haji Adnan Haji Yaakob.

Penganugerahan ini suatu pengiktirafan kecemerlangan Tengku Abdullah sebagai Tengku Mahkota Pahang sejak 40 tahun yang lepas dan sumbangan istimewa Tuanku sebagai Canselor UMP sejak tahun 2006 serta kepimpinan berwibawa Tuanku sebagai peneraju pelbagai pertubuhan di dalam dan di luar Malaysia.

"Pada usia semuda 18 tahun ketika itu, saya telah diberikan amanah yang besar oleh Paduka Ayahanda sebagai seorang Waris Ganti dengan pelbagai tanggungjawab terhadap rakyat jelata yang sentiasa dekat di hati saya dan kewajipan terhadap negeri Pahang Darul Makmur yang amat saya cintai.

Dalam tempoh yang tersebut, sehinggalah ke detik bersejarah pada hari ini, bairda sentiasa belajar untuk memimpin berdasarkan pelbagai pengetahuan dan pengalaman yang ditimba melalui pembacaan, pergaulan dengan mereka yang arif dan bijaksana, serta pelbagai peristiwa yang mematangkan pemikiran, pertimbangan dan tindakan saya," ujar baginda dalam menyampaikan titah.

Baginda juga menasihatkan para graduan yang diijazahkan pada hari ini untuk terus istiqomah menghayati nilai-nilai murni bukan sahaja dalam kehidupan peribadi anda, tetapi juga dalam pelaksanaan tanggungjawab profesional anda di tempat kerja.

Kata baginda, sebagai graduan pada hari ini, graduan telah menjadi sebahagian daripada komuniti insan terpelajar yang turut membawa status alumni UMP. Banyak masa, tenaga dan wang ringgit telah dilaburkan untuk menjadikan anda sekalian insan terpelajar, maka janganlah kerana kesilapan pertimbangan atau kecuaiian tindakan anda selepas ini, segala yang telah dilaburkan oleh keluarga dan kerajaan untuk selama ini menjadi sia-sia.

Selain itu, jawatan di peringkat pengurusan dan profesional sama ada di sektor awam dan swasta yang mendedahkan kepada pelbagai tanggungjawab dan juga kuasa untuk membuat sesuatu keputusan. Hal ini tentunya menuntut akauntibiliti yang tinggi daripada anda sebagai golongan eksekutif dan profesional yang beretika dan berintegriti.

"Namun sekiranya nilai-nilai murni yang saya nyatakan tadi tidak dihayati sepenuhnya dalam jiwa, pemikiran dan tindakan anda, maka sudah tentu anda berisiko tinggi terlibat dalam penyelewengan, salah guna kuasa, rasuah dan lain-lain bentuk jenayah kolar putih pastinya merosakkan status sebagai orang yang terpelajar," ujar baginda.

Dalam pada masa yang sama Tengku Abdullah turut menyampaikan anugerah kepada 23 graduan cemerlang. Anugerah Pelajaran Diraja (Pingat Jaya Cemerlang) dianugerahkan kepada graduan Sarjana Muda Pengurusan Teknologi Industri Dengan Keujian, Foo Weng Kar dan Siti Rahmah Rahim yang merupakan graduan sarjana muda (Keujian) Kejuruteraan Kimia.

Lain-lain Anugerah Canselor, Anugerah Naib Canselor, Anugerah Emas Universiti, Kecemerlangan Yayasan Pahang, Kecemerlangan Profesor Dato' Dr. Mashitah Mohd. Yusoff dan Srikandi Matahari.

Manakala dua anugerah yang baharu diperkenalkan kali ini adalah Kecemerlangan Profesional Pembelajaran Sepanjang Hayat sumbangan UMP Advanced Education dan Anugerah Prihatin Komuniti Puspanita sumbangan Persatuan Suri & Anggota

Perkhidmatan Awam Malaysia (PUSPANITA) sebagai pemangkin semangat dan tanda penghargaan di atas usaha graduan yang berbakti kepada komuniti dan masyarakat.

Anugerah ini juga adalah bagi memberi pengiktirafan kepada penglibatan graduan dalam projek atau program berimpak tinggi yang melibatkan komuniti, masyarakat setempat, universiti, badan kerajaan dan bukan kerajaan (NGO).

Selain itu, baginda turut mengurniakan anugerah anumerta kepada mendiang Kamalanathan A/L Narayanan graduan Sarjana Muda (Kepujian) Kejuruteraan Kimia yang meninggal dunia tanpa sempat menamatkan pengajian. Hadir menerima anugerah ibunya, Shoba A/P Perumal di bilik kamar selepas tamat sidang pertama majlis. Seramai 2845 graduan Universiti Malaysia Pahang (UMP) dirai dalam Majlis Konvokesyen UMP kali ke-12 yang dijadualkan berlangsung selama tiga hari mulai 18 hingga 20 November 2017.

Disediakan oleh Bahagian Komunikasi Korporat

Posted By : NORHIDAYAH BINTI MOHAMAD Date Posted : 18-11-2017, 15:15:58